



Broj: 01-50-1-54-57/05.  
Sarajevo, 17. maja 2005.

## ZAPISNIK

57. sjednice Predstavničkog doma  
Parlamentarne skupštine Bosne i Hercegovine,  
održane 17. maja 2005. godine

Sjednica je počela u 10,10 sati. Prisustvovalo je 39 poslanika. Odsustvo su opravdali Ibrahim Đedović i Nijaz Duraković.

Iz Vijeća ministara BiH sjednici su prisustvovali: ministri Ljerka Marić i Branko Dokić, te zamjenici ministara Haris Bašić i Dragan Mektić. Sjednici su također prisustvovali predstavnici Pravobranilaštva BiH i "Službenog lista BiH", zbog razmatranja njihovih izvještaja.

Iz međunarodnih organizacija sjednicu su pratili: Maja Ribar i Sanja Stevanović – OHR, Kristijan Haupt – OSCE, Amra Alispahić - DEI, Chever Voltmer, Slive Woltman i Mirsad Žiga – američka ambasada i Nihad Nakaš - US treasury.

Uvodne napomene o prijedlogu dnevnog reda dao je predsjedavajući Šefik Džaferović. On je, između ostalog, upoznao poslanike o izmjenama prijedloga dnevnog reda koji su dobili u pozivu za sjednicu, a to su:

- Prijedlog zakona o izmjenama i dopunama Zakona o Ombdusmenu za ljudska prava BiH skinut je zato što je nadležna komisija zatražila produženje roka za razmatranje kako bi se o amandmanima izjasnio predlagač Zakona i
- u dnevni red uvršten je Prijedlog odluke o utvrđivanju prestanka poslaničkog mandata Ivi Miri Joviću, nakon što je imenovan za člana Predsjedništva BiH.

U okviru rasprave povodom prijedloga dnevnog reda učestvovali su: Nikola Špirić, Jozo Križanović, Beriz Belkić, Sead Avdić, Zlatko Lagumdžija, Momčilo Novaković i Milorad Živković.

**Nikola Špirić** predložio je da se u dnevni red uvrsti donošenje zaključka u vezi s mandatom generalnog revizora i njegovih zamjenika. Prijedlog je obrazložio i iznio tekst zaključka.

**Jozo Križanović** iznio je primjedbu na 3. tačku - Zahtjev Vijeća ministara za razmatranje Prijedloga zakona o izmjenama i dopunama Zakona o porezu na dodatu vrijednost po hitnom postupku, u skladu s članom 105. Poslovnika, jer Vijeće ministara nije izvršilo zaključak Proširenog kolegija sa sjednice od 4. maja 2005., kojim je zatraženo da dostavi informaciju o tome dokle se stiglo s reformama u ovoj oblasti i obrazloženje zašto se nisu ispoštovali rokovi postavljeni Zakonom. Rekao je, između ostalog, da će poslanici imati poteškoća u razmatranju ovog zakona bez relevantne informacije o reformama, zbog čega je izrazio rezervu prema tome da ova tačka ostane na dnevnom redu.

**Beriz Belkić** rekao je, pored ostalog, da se slaže s mišljenjem Križanovića u vezi s informacijom, ali da njegov klub smatra da je bolje da ova tačka ostane na dnevnom redu, a da očekuje da će predlagač Zakona biti na sjednici i objasniti sporna pitanja.

**Sead Avdić je**, u ime Mješovitog kluba, predložio da se Domu podnese informacija o toku razgovora o usaglašavanju reforme policijskih snaga.

**Zlatko Lagumdžija** podržao je prijedlog Seada Avdića i predložio da predsjedavajući Vijeća ministara, kao kopredsjedavajući pregovora, podnese informaciju o dešavanjima tokom pregovora.

**Momčilo Novaković se**, u ime Kluba SDS-a, usprotivio da se danas raspravlja o informaciji koju je predložio Sead Avdić, s obzirom da se radi o pregovorima političkih stranaka, jer oni nemaju informaciju od ljudi iz SDS-a koji su učestvovali u pregovorima. Naglasio je da informacija kopredsjedavajućeg pregovora za njih nije relevantna, s obzirom na sve što se dešavalo u vezi s radom ranije komisije.

**Milorad Živković** predložio je da se u 11. tačku uvrsti i Aneks VII. na Ugovor s Republikom Hrvatskom, koji se tiče graničnog prijelaza u Kostajnici.

Nakon što je predsjedavajući sumirao prijedloge za dopunu dnevnog reda, Dom se izjasnio o prijedlozima Špirića, Avdića i Lagumdžije.

Prijedlog Nikole Špirića usvojen je s 33 glasa "za", jednim "protiv" i jednim "suzdržanim".

Prijedlog Avdića i Lagumdžije nije dobio entitetsku većinu, a nakon usaglašavanja, u drugom krugu glasanja, iz Republike Srpske "protiv" je glasalo 11 poslanika, što je više od 2/3 iz entiteta, pa prijedlog, prema tome, nije usvojen.

Što se tiče prijedloga Živkovića, predsjedavajući je rekao da Aneks VII. nije dostavljen Domu, pa se, stoga, ne može ni glasati o njegovom uvrštavanju u devni red. Zatim je konstatirao da 57. sjednica ima sljedeći

## D N E V N I R E D

1. Zapisnik 56. sjednice Predstavničkog doma,
2. Poslanička pitanja i odgovori,
3. Zahtjev Vijeća ministara za razmatranje Prijedloga zakona o izmjenama i dopunama Zakona o porezu na dodatu vrijednost po hitnom postupku, u skladu s članom 105. Poslovnika,
4. Prijedlog zakona o Javnom radiotelevizijskom sistemu Bosne i Hercegovine (prvo čitanje),
5. Prijedlog zakona o zaduživanju, dugu i garancijama Bosne i Hercegovine (prvo čitanje),
6. Prijedlog zakona o Službi za poslove sa strancima (prvo čitanje),
7. Izvještaj o finansijskom poslovanju JPNIO "Službeni list BiH" po godišnjem obračunu za period od 1. januara do 31. decembra 2004.,
8. Izvještaj o radu Pravobranilaštva BiH za period 1.1. 2004. do 31.12.2004.,
9. Prijedlog tumačenja na zahtjev Komisije za razmatranje statusa osoba naturaliziranih poslije stupanja na snagu Ustava BiH do stupanja na snagu Zakona o državljanstvu BiH,
10. Prijedlog odluke o utvrđivanju prestanka poslaničkog mandata Ivi Miri Joviću, poslaniku u Predstavničkom domu Parlamentarne skupštine BiH,
11. Davanje saglasnosti za ratifikaciju:
  - a) Sporazuma između Bosne i Hercegovine i Republike Hrvatske o pograničnom saobraćaju i saradnji,
  - b) Sporazuma između Vijeća ministara BiH i Vlade Republike Hrvatske o uzajamnom ukidanju viza,
  - c) Ugovora između Bosne i Hercegovine i Republike Hrvatske o zajedničkim lokacijama na graničnim prijelazima,
  - d) Aneksa II. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Doljani – Metković,
  - e) Aneksa III. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Neum I – Klek.

- f) Aneksa IV. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Neum II – Zaton Doli,
  - g) Aneksa V. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Velika Kladaša – Maljevac,
  - h) Aneksa VI. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Izačić-Ličko Petrovo Selo,
12. Prijedlog zaključaka u vezi s mandatom generalnog revizora i njegovih zamjenika.

### **Ad – 1:** Zapisnik 56. sjednice Predstavničkog doma

Zapisnik je usvojen jednoglasno, bez primjedbi.

### **Ad – 2:** Poslanička pitanja i odgovori

Predsjedavajući Džaferović konstatirao je da su odgovore na pitanja dobili poslanici: Vinko Zorić, Azra Hadžiahmetović i Seada Palavrić. Odgovor ministra odbrane na pitanja u vezi s polaganjem zakletve vojnika na Manjači i u Bileći dobili su Mladen Potočnik, Seada Palavrić i Sead Avdića.

Odgovore na pitanja komentirali su Mladen Potočnik i Filip Andrić, kao i Ivo Lozančić na odgovor koji je dobio na 56. sjednici.

Poslanička pitanja postavljena su kako slijedi:

#### **Muhamed Moranjković:**

«1. Ko propisuje pravila ponašanja (jer ovakva javnim zakonom nisu propisana) – SIPI i ostalim raznim pratnjama – raznih ličnosti (pa i sami sebi) – koji su učesnici u javnom saobraćaju na našim cestama u BiH – jer evidentno je da isti vrše torturu (nepotrebno) nad ostalim učesnicima u javnom saobraćaju – iz objesti demonstrirajući silu **države** i savremenu **hajdučiju**» Ko ovo u ovoj zemlji kontrolira?»

#### **Dužanka Majkić:**

«Dokle se došlo s izmjenom Zakona o carinskoj politici BiH po kome bi domaćim investitorima bilo omogućeno da u ravnopravnim uslovima kao i strani investitori u BiH (s ciljem doprinosa bržem razvoju, proizvodnji i zapošljavanju) budu oslobođeni plaćanja uvoznih dažbina za opremu koja se koristi za proizvodnju?»

#### **Filip Andrić:**

«Pitam naš sekretarijat – kada ću početi dobivati materijal na hrvatskom jeziku i na latinici, kao poslanik iz reda hrvatskog naroda?»

#### **Tihomir Gligorić:**

«Zašto Parlamentarna skupština BiH nije 9. maja potpisala Rezoluciju o antifašizmu, jer je to bio povod sazivanja Parlamentarne skupštine BiH, i ko snosi odgovornost za taj propust?»

Tražim pisani odgovor od Kolegija Predstavničkog doma o fazama odlučivanja o Rezoluciji o antifašizmu u oba doma, kao i dan konačnog potpisivanja od strane oba predsjedavajuća, te ko je odlučio o protokolarnom nastupu člana Predsjedništva BiH Sulejmana Tihića, jeste li imali o tome saglasnost i kako ste odlučivali? Da li je bilo, eventualno, zloupotrebe u vezi s nastupom pred

Parlamentarnom skupštinom od strane gosp. Sulejmana Tihica, što bih volio čuti od svakog člana Kolegija pojedinačno?»

**Vinko Zorić:**

«Predlažem da Regulatorna agencija pregleda snimak emisije «60 minuta» od 16. maja 2005. te da nas obavijesti o sljedećem:

- da li je urednik krivo i neobjektivno komentirao komemorativni skup održan 14. maja ove godine u Bleiburgu pod pokroviteljstvom Hrvatskog sabora?
- da li su primjerene paralele u kojima je pominjan taj komemorativni skup i učesnici tog skupa, kao i kontekst u kojem su pominjani?

Moje mišljenje je da se prema svim žrtvama i komemorativnim skupovima treba odnositi s velikom dozom pristojnosti i pijeteta, što nije primijećeno kod pomenutog urednika, dapače, on je, kao i uvijek, htio sve to prikazati u samo njemu poznatom svjetlu i iz samo njemu poznatih razloga. Pogotovo osuđujem kontekst u kojem je sve ovo pomenuo.»

**Ivo Lozančić:**

«Da li Ministarsko vijeće planira učestvovati u uređenju plinske i naftne problematike u Bosni i Hercegovini i na koji način i u kojem vremenu? Hoće li se predlagati sistematska rješenja kroz zakon o plinu u Bosni i Hercegovini i zakon o nafti u Bosni i Hercegovini, ili će se ići s izjavama o politici za pomenute energente kako je to urađeno za elektroenergetski sektor?»

**Seada Palavrić:**

Zatražila da se urgira kako bi dobila odgovor na pitanja koja je postavila Tužilaštvu i Sudu BiH.

**Ad – 3:** Zahtjev Vijeća ministara za razmatranje Prijedloga zakona o izmjenama i dopunama Zakona o porezu na dodatu vrijednost po hitnom postupku, u skladu s članom 105. Poslovnika

Ministrica Ljerka Marić obrazložila je zahtjev za hitni postupak, kao i Prijedlog za izmjene i dopune Zakona.

U raspravi su učestvovali: Beriz Belkić, Seada Palavrić, Muhamed Moranjkić, Sead Avdić, Ljiljana Milićević, Jozo Križanović, Selim Bešlagić, Zlatko Lagumdžija i Mladen Potočnik. U okviru rasprave govirila je i ministrica Ljerka Marić.

Dom je, poslije rasprave, usvojio zahtjev Vijeća ministara za hitni postupak – "za" je glasalo 18, "protiv" 11, "suzdržana" su bila četiri poslanika. Po entitetima, iz Federacije "za" je glasalo 14, iz Republike Srpske četiri poslanika. Kako nije bilo entitetske većine proveden je postupak usaglašavanja u Kolegiju kao komisiji. Predsjedavajući je obavijestio Dom da je postignuta saglasnost, pa je tako zahtjev usvojen.

Sa 20 glasova "za", četiri "protiv" i 11 "suzdržanih" – iz Federacije BiH "za" je glasalo 14, iz RS šest – usvojen je Zakon o izmjenama i dopunama Zakona o porezu na dodatu vrijednost.

Dalje je Dom, na prijedlog Zlatka Lagumdžije iznesen u raspravi, usvojio sljedeći

**Z A K L J U Č A K**

**1. Predstavnički dom od Vijeća ministara BiH zahtijeva da Parlamentarnoj skupštini BiH dostavi plan provođenja poreza na dodatu vrijednost.**

**2. Zadužuje se Vijeće ministara BiH da sačini i Domu dostavi akcioni plan socijalnih programa vezanih za primjenu Zakona o porezu na dodatu vrijednost.**

Nije usvojen 3. prijedlog zaključka Zlatka Lagumdžije – da Predstavnički dom zahtijeva pokretanje smjene Upravnog odbora Uprave za indirektno oporezivanje, u skladu sa Zakonom. "Za" ovaj prijedlog glasalo je 15, "protiv" 16, "suzdržanih" je bilo pet poslanika.

**Ad – 4:** Prijedlog zakona o Javnom radiotelevizijskom sistemu Bosne i Hercegovine (prvo čitanje)

Uvodne napomene o Prijedlogu zakona dao je predsjedavajući Doma Šefik Džaferović.

U raspravi su učestvovali: Filip Andrić, Seada Palavrić, Beriz Belkić, Martin Raguž, Ruža Sopta, Azra Hadžiahmetović, Vinko Zorić, Jozo Križanović, Miloš Jovanović, Mladen Potočnik, Zlatko Lagumdžija, Sead Avdić i Adem Huskić.

Poslije rasprave, s 29 glasova "za", 9 "protiv" i jednim "suzdržanim", usvojen je Prijedlog zakona u prvom čitanju. Zatim je usvojen i prijedlog predsjedavajućeg da se pređe u drugo čitanje.

Predsjedavajući je konstatirao da su u plenarnoj fazi amandmane podnijeli Klub poslanika HDZ – Demokršćani – tri amandmana i Ruža Sopta i Filip Andrić – deset amandmana, koje žele braniti u plenarnoj fazi. Kako nije bilo rasprave u drugom čitanju, predsjedavajući je na glasanje dao amandmane, svaki pojedinačno.

Nije usvojen nijedan amandman ni Kluba HDZ – Demokršćani, niti Ruže Sopte i Filipa Andrića.

Poslije glasanja o svim amandmanima, predsjedavajući je na glasanje dao Prijedlog zakona u drugom čitanju.

"Za" je glasalo 26, "protiv" devet, "suzdržana" su bila tri poslanika. Po entitetima, iz Republike Srpske "za" je glasalo 12, iz Federacije BiH 14 poslanika.

Predsjedavajući je konstatirao da je usvojen Zakon o Javnom RTV sistemu.

**Ad – 5:** Prijedlog zakona o zaduživanju, dugu i garancijama Bosne i Hercegovine (prvo čitanje)

Poslije uvodnih napomena predsjedavajućeg, Dom je usvojio Prijedlog zakona u prvom čitanju. "Za" je glasao 21, a "protiv" dva poslanika.

"Za" prijedlog predsjedavajućeg da se pređe u drugo čitanje glasao je 21 poslanik, a pet poslanika glasalo je "protiv", pri čemu su iz Republike Srpske "za" glasala četiri poslanika. Kako nije bilo entitetske većine, izvršeno je usaglašavanje u Kolegiju kao komisiji, pa je predsjedavajući obavijestio da je postignuta saglasnost i time usvojen prijedlog za drugo čitanje.

U drugom čitanju u raspravi su učestvovali: Momčilo Novaković, Nikola Špirić i Tihomir Gligorić.

Poslije rasprave, predsjedavajući Džaferović podsjetio je da je Momčilo Novaković podnio šest amandmana koje brani u plenarnoj fazi, pa je amandmane dao na glasanje.

Nije usvojen nijedan amandman.

Nakon glasanja o amandmanima, Dom je, s 30 glasova "za", sedam "protiv" i jednim "suzdržanim" - Federacija BiH 23, RS sedam, usvojio Zakon o zaduživanju, dugu i garancijama Bosne i Hercegovine.

**Ad – 6:** Prijedlog zakona o Službi za poslove sa strancima (prvo čitanje)

Prijedlog zakona usvojen je jednoglasno u pravom čitanju, bez rasprave.

S 36 glasova "za" i jednim "suzdržanim" usvojen je prijedlog za drugo čitanje.

U drugom čitanju kratko je diskutirao Momčilo Novaković, a zatim je Dom jednoglasno (prisutno 35 poslanika) usvojio Zakon o Službi za poslove sa strancima.

**Ad – 7:** Izvještaj o finansijskom poslovanju JPNIO " Službeni list BiH" po godišnjem obračunu za period od 1. januara do 31. decembra 2004.

O ovoj tački vođena je duža rasprava u kojoj su učestvovali: Ljiljana Milićević (u ime Komisije za finansije i budžet), Momčilo Novaković, Nikola Špirić, Beriz Belkić, Selim Bešlagić, Senija Kapetanović, Vinko Zorić, Mirsad Čeman i Petar Kunić. U ime "Službenog lista BiH" govorio je v.d. direktora Mehmedalija Huremović.

U raspravi je, uz ostalo, iznesena primjedba da Vijeće ministara još nije postupilo po zaključku Doma, usvojenom prilikom usvajanja Izvještaja "Službenog lista BiH" za 2003. – da riješi pravni status "Službenog lista BiH".

Poslije rasprave, predsjedavajući je na glasanje dao Izvještaj "Službenog lista BiH", sa Izvještajem nadležne komisije i predloženim zaključcima.

"Za" je glasao 21, "protiv" četiri, "suzdržan" jedan poslanik – po entitetima, iz Federacije BiH "za" je glasalo 19, iz Republike Srpske dva poslanika. Zbog nedostatka entitetske većine, izvršeno je usaglašavanje u Kolegiju kao komisiji. Kako nije bilo saglasnosti, provedeno je glasanje u drugom krugu – prvo elektronski, kada je iz RS devet poslanika glasalo "protiv", što je manje od 2/3.

Momčilo Novaković izrazio je sumnju u vjerodostojnost rezultata glasanja, pa je predsjedavajući pozvao sekretara Doma da prozove poslanike iz RS-a radi glasanja.

Sekretar Doma Branka Todorović izvršila je prozivanje radi glasanja, kada je iz Republike Srpske "protiv" glasalo 10 poslanika.

Predsjedavajući Džaferović konstatirao je da nije usvojen Izvještaj o finansijskom poslovanju JPNIO "Službeni list BiH" po godišnjem obračunu za period od 1. januara do 31. decembra 2004.

**Ad – 8:** Izvještaj o radu Pravobranilaštva BiH za period 1.1. 2004. do 31.12.2004.

Izvještaj o radu Pravobranilaštva usvojen je bez rasprave, s 31 glasom "za" i jednim "suzdržanim".

**Ad – 9:** Prijedlog tumačenja na zahtjev Komisije za razmatranje statusa osoba naturaliziranih poslije stupanja na snagu Ustava BiH do stupanja na snagu Zakona o državljanstvu BiH

U uvodnim napomenama predsjedavajući je podsjetio na stav Komisije o ovom pitanju.

Nije bilo rasprave, pa je Dom, s 29 glasova "za", dva "protiv" i dva "suzdržana", usvojio Izvještaj Ustavnopravne komisije, po kojem će se tumačenje zatražiti od visokog predstavnika i komandanta snaga EUFOR-a.

**Ad – 10:** Prijedlog odluke o utvrđivanju prestanka poslaničkog mandata Ivi Miri Joviću, poslaniku u Predstavničkom domu Parlamentarne skupštine BiH

Dom je, bez rasprave, usvojio Odluku o utvrđivanju prestanka poslaničkog mandata Ivi Miri Joviću. "Za" Odluku je glasalo 30, "protiv" jedan i jedan poslanik je bio "suzdržan".

**Ad – 11:** Davanje saglasnosti za ratifikaciju:

- a) Sporazuma između Bosne i Hercegovine i Republike Hrvatske o pograničnom saobraćaju i saradnji,
- b) Sporazuma između Vijeća ministara BiH i Vlade Republike Hrvatske uzajamnom ukidanju viza,
- c) Ugovora između Bosne i Hercegovine i Republike Hrvatske o zajedničkim lokacijama na graničnim prijelazima,
- d) Aneksa II. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Doljani – Metković,
- e) Aneksa III. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Neum I – Klek,

- f) Aneksa IV. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Neum II – Zaton Doli,
- g) Aneksa V. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Velika Kladaša – Maljevac,
- h) Aneksa VI. Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Izačić-Ličko Petrovo Selo.

U raspravi o ovoj tački učestvovali su: Milorad Živković, Jozo Križanović i Momčilo Novaković.

Milorad Živković ponovio je svoj zahtjev, iznesen prilikom rasprave o prijedlogu dnevnog reda, da se u ovu tačku uvrsti Aneks VII. ako je moguće, a ako nije, da se akti od podtačke c) do h) vrata Komisiji za vanjske poslove, pa da se u dnevni red uvrste kada stigne i ovaj aneks.

Jozo Križanović iznio je mišljenje da se vrlo često formalno pristupa davanju saglasnosti za ratifikaciju međunarodnih sporazuma i ugovora. Konstatirao je da je većina tih akata potpisana prije dvije godine i više, te se postavlja pitanje šta je razlog da se ovoliko kasni s ratifikacijom. Među ovim aktima nalazi i jedan koji je prestao važiti 1. jula 2004. Stoga sugerira Komisiji za vanjske poslove Doma da malo serioznije pristupi izvještajima koje dostavlja Domu, jer na ovom izvještaju nema čak ni datuma kada je održana sjednica Komisije, rekao je, uz ostalo, Križanović.

Momčilo Novaković rekao je da će Klub SDS-a podržati samo akte pod a) i b), u vezi s ostalim je podržao stav Živkovića.

Radomir Bogdanović, šef Odsjeka za međunarodnopravne poslove u MVP-u, upoznao je poslanike o tome da se upravo danas na sjednici Vijeća ministara razmatraju pojedini sporazumi, te da je sada obaviješten da je usvojen Aneks VII. o kojem je govorio Milorad Živković. Svi akti koji su danas na dnevnom redu prošli su proceduru u skladu sa Zakonom i Ustavom, rekao je, uz ostalo, Bogdanović i predložio da Dom da' saglasnost na akte koji su na dnevnom redu.

Poslije izlaganja Radomira Bogdanovića, predsjedavajući Džaferović rekao je da se radi o međunarodnim obavezama koje je BiH već ugovorila i da je ovo faza ratifikacije, a da će i ugovor za Kostajnicu biti upućen u Parlament, kako je rekao predstavnik MVP-a. Zamolio je da se u tom smislu ima razumijevanja.

Prvi zamjenik predsjedavajućeg Nikola Špirić zatražio je petominutnu pauzu .

Poslije pauze, Milorad Živković rekao je da su u pauzi izvršili određene konsultacije, pa je predložio da se akti od c) do h) vrata Komisiji i da oni budu predmet rasprave kada se dostavi i Aneks VII. koji se odnosi na prijelaz u Kostajnici.

Predsjedavajući Džaferović izrazio je žaljenje zbog stava koji je iznio predsjedavajući Kluba SNSD-a, jer misli da nam ta vrsta nepovjerenja nije potrebna. Zatim je na glasanje dao sporazume pod a) i b).

Dom je dao saglasnost za ratifikaciju:

- a) Sporazuma između Bosne i Hercegovine i Republike Hrvatske o pograničnom saobraćaju i saradnji (jednoglasno)
- b) Sporazuma između Vijeća ministara BiH i Vlade Republike Hrvatske uzajamnom ukidanju viza (jednoglasno).

Dalje je predsjedavajući rekao da je njegova procjena da akti od c) do h) ne bi dobili većinu, pa je na glasanje dao prijedlog da se izjašnjavanje o njima odgodi.

Ovaj prijedlog usvojen je s 25 glasova "za", šest "protiv" i dva "suzdržana" – iz Federacije BiH "za" je glasalo 12, iz Republike Srpske 13 poslanika.

#### **Ad – 12:** Prijedlog zaključaka u vezi s mandatom generalnog revizora i njegovih zamjenika

U okviru ove tačke u raspravi su učestvovali Šefik Džaferović i Nikola Špirić.

Šefik Džaferović predložio je modifikaciju prvog zaključka koji je predložio Nikola Špirić. S 31 glasom "za", jednim "protiv" i dva "suzdržana" usvojen je sljedeći

### **ZAKLJUČAK**

- 1. Ranije date saglasnosti na imenovanje generalnog revizora i zamjenika generalnog revizora važe do novog imenovanja.**
- 2. Zahtijeva se od Vijeća ministara BiH da, bez odgađanja, u parlamentarnu proceduru dostavi prijedlog novog zakona o reviziji institucija BiH.**

Ovim je realiziran dnevni red 57. sjednice.  
Sjednica je završena u 16,35 sati.  
Sastavni dio Zapisnika je transkript sjednice.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**Šefik Džaferović**